

15/03/2000

Tiada bantuan luar menang pilihan raya

KERAJAAN tidak pernah meminta bantuan dan sokongan mana-mana negara asing dalam usaha memenangi pilihan raya umum baru-baru ini, seperti yang didakwa pihak pembangkang.

Timbalan Menteri Luar, Datuk Leo Michael Toyad berkata, dakwaan kononnya Perdana Menteri, Datuk Seri Dr Mahathir Mohamad meminta Perdana Menteri China, Zhu Rongji melawat Malaysia sebagai taktik pilihan raya, tidak benar dan berniat jahat.

"Sebenarnya, lawatan rasmi yang diadakan pada 22 hingga 26 November 1999 itu adalah di atas jemputan Perdana Menteri yang sudah lama dirancang. Ia langsung tidak ada kena mengena dengan pilihan raya lalu," katanya ketika menggulung Perbahasan Belanjawan 2000 bagi Kementerian Luar.

Sebaliknya, beliau berkata, lawatan Perdana Menteri China itu adalah sebahagian daripada rangka lawatan pemimpin China itu ke negara Asean lain seperti Filipina, Singapura dan Vietnam.

Menurut Toyad, Perdana Menteri Zhu Rongji turut menafikan perkara itu ketika disoal oleh seorang wartawan di majlis ceramah yang dianjurkan oleh Dewan Perniagaan dan Industri Kebangsaan Malaysia pada 24 November 1999 lalu.

Toyad juga menafikan tuduhan kononnya kerajaan mengamalkan "double standard" dalam penetapan pendirian terhadap beberapa dasar luar negara yang membabitkan pencabulan hak asasi dan kezaliman terhadap Kosovo, Chechnya, rakyat Kashmir dan Timor Timur.

Katanya, Malaysia tidak pernah teragak-agak memperjuangkan hak rakyat mana-mana negara teraniaya selagi tindakan yang dibuat oleh kerajaan tidak dianggap sebagai campur tangan dalam urusan dalaman sebuah negara.

Menurutnya, sehingga kini Malaysia memainkan peranan yang aktif dalam menyuarakan rasa tidak puas hati terhadap isu membabitkan kezaliman melalui forum antarabangsa seperti Pertubuhan Persidangan Negara-Negara Islam (OIC), Pergerakan Negara-Negara Berkecuali (NAM) dan Pertubuhan Bangsa-Bangsa Bersatu (PBB).

(END)